

Majikan jangan salah sangka

AMARAN Datuk Seri Dr. Mahathir kepada pihak majikan jangan berlaku tidak adil kepada pekerja-pekerja mereka adalah wajar kerana mungkin ada majikan yang salah sangka bahawa undang-undang buruh yang baru dipinda dan dibantah oleh sebahagian kesatuan sekerja adalah untuk kepentingan mereka sahaja.

Undang-undang yang dipinda itu adalah untuk memelihara hubungan baik antara pekerja dengan majikan dan tidak sekali-kali hendak memberi "lesen" kepada majikan supaya melakukan sekehendak hati terhadap pekerja-pekerja mereka. Jika demikianlah kehendaknya, maka undang-undang itu tentulah tidak adil dan tidak ada kerajaan yang sanggup membuat undang-undang yang tidak adil dan menekan kaum pekerja.

Timbalan Perdana Menteri berkata kerajaan tidak akan membenarkan sebarang tindakan yang tidak adil oleh majikan terhadap pekerja-pekerja mereka dan jika didapati ada majikan yang berlaku tidak adil kepada pekerja-pekerja mereka atau tidak mengendahkan hak-hak pekerja, maka kerajaan tidak ragu-ragu untuk bertindak terhadap majikan yang berkenaan.

Apa yang disebut oleh Datuk Seri Dr. Mahathir itu bukanlah semata-mata kerana hendak menyenangkan hati kaum pekerja berhubung dengan pelaksanaan undang-undang buruh tetapi kerana telah menjadi kewajipan kerajaan untuk menyaksikan bahawa keadilan diamalkan dalam hubungan majikan dengan pekerja. Kerajaan tentulah menyedari bahawa kegelisahan perusahaan boleh berlaku sekiranya salah satu pihak dibiar melakukan sesuatu dengan sewenang-wenang terhadap pihak yang lain.

Malah seperti kata Tengku Razaleigh Hamzah pula, kerajaan tidak akan menunggu bagi kesatuan-kesatuan sekerja bertindak tetapi akan bertindak sendiri untuk membela kepentingan dan kebajikan kaum pekerja di negara ini. Dengan lain-lain perkataan, sekiranya pemimpin-pemimpin kaum pekerja lambat bertindak sedangkan kerajaan mengetahui sesuatu ketidakadilan telah berlaku ke atas satu golongan kaum pekerja, maka kerajaan sendiri akan bertindak untuk memaksa pihak majikan berlaku lebih adil.

Apa yang dipentingkan ialah kerjasama di antara pihak majikan dengan pihak pekerja dan tiada siapa pun akan cuba mengambil kesempatan dari sebarang "celah" dalam undang-undang buruh untuk berlaku kurang adil terhadap yang lain.

Kerajaan memang mempunyai kewajipan menjaga kepentingan kedua-dua pihak majikan dan pekerja, kerana ia berkewajipan menjaga kepentingan seluruh rakyat. Itulah sebabnya diadakan undang-undang, termasuk undang-undang buruh, untuk menjaga kepentingan pekerja dan kepentingan majikan.